

遊城南記

附太華太白紀游略

關中叢書

遊城南記

邵力子署

四庫全書總目

游城南記一卷

宋張禮撰禮字茂中浙江人元祐元年與其友楚人陳明微游長安城南訪唐代都邑舊址因作此記而自爲之注凡門坊寺觀園囿村墟及前賢遺迹見於載籍者敍錄甚備如嘉話錄載慈恩寺題名始於張莒禮則引唐登科記謂進士中有大中十三年及第之張台而無張莒又長安志載章敬寺本魚朝恩莊後爲章敬皇后立寺故以爲名禮則以宋代寺基與志所載地理不同而疑其已非古址皆能據所目見

而考辨之其徵據頗爲典核所列金石碑刻名目亦可與集古錄諸書互相參證每條下閒有續注不知何人所增中有金代年號其薦福寺一條又有辛卯遷徙之語案辛卯爲金哀宗正大八年史載是年四月元兵克鳳翔兩行省棄京兆遷居民於河南所云遷徙當卽此事蓋金末元初人也

游城南記

浙右張禮茂中撰

元祐改元季春戊申明微茂中同出京兆之東南門

張注曰唐皇城之安上門也至德二載改爲先天門尋復舊肅宗以祿山國讐惡聞其姓京兆坊里有安子者率易之續注曰志總序云唐開元元年改雍州爲京

兆府以京城爲西京天祐元年昭宗東遷降爲佑國軍梁開平元年改府曰大安越二年改軍曰永平後唐同光二年復爲西京晉天福元年改軍曰晉昌漢乾祐元年改軍曰永興其府名皆仍舊有宋因之故其南北相

直之街亦曰安上

歷興道務本二坊

張注曰興道坊在安上門街之西景龍三年改瑤林坊
務本坊在安上門街之東與興道坊相對景龍二年改
玉樓坊景雲元年竝復舊二坊之地今爲京兆東西門
外之草市餘爲民田

由務本西門入聖容院觀薦福寺塔

張注曰聖容院蓋唐薦福寺之院也今爲二寺寺之浮
圖今正謂之薦福寺塔尙存焉其寺文明元年立謂之
大獻佛寺天授元年改爲薦福寺景龍中宮人率出錢

起塔十五層 續注曰貞祐乙亥歲塔之纏腰尙存辛卯遷徙廢蕩殆盡惟磚塔在焉

南行至永樂坊

張注曰卽橫岡之第五爻也今謂之草場坡古場存焉隋宇文愷城大興以城中有六大岡東西橫互象乾之六爻故于九二置宮室以當帝王之居九三置百司以應君子之數九五貴位不欲常人居之故置玄都觀大興善寺以鎮之玄都觀在崇業坊大興善寺在靖善坊其岡與永樂坊東西相直長安志云坊東有裴度宅度欲入朝有張權輿上疏云度名應圖讖宅據岡原蓋嘗

有人與度作讖云非衣小兒坦其腹天上有口被驅逐
言度曾討淮西平吳元濟宅據岡原與興善玄都相連
故也

東南至慈恩寺少遲登塔觀唐人留題

張注曰寺本隋無漏寺貞觀二十一年高宗在春宮爲
文德皇后立爲慈恩寺永徽三年沙門元奘起塔初惟
五層磚表土心效西域窣堵波卽袁宏漢記所謂浮圖
祠也長安中推倒天后及王公施錢重加營建至十層
其云雁塔者天竺記達嚩國有迦葉佛伽藍穿石山作
塔五層最下一層作雁形謂之雁塔蓋此意也嘉話錄

謂張莒及進士第閒行慈恩寺因書同年姓名于塔壁
後以爲故事按唐登科記有張台無張莒台于大中十
三年崔鋤下及第馮氏引之以爲自台始若以爲張莒
則台時已有題名之說焉塔自兵火之餘止存七層長
興中西京留守安重霸再修之判官王仁裕爲之記長
安士庶每歲春時游者道路相屬熙寧中富民康生遺
火經宵不滅而游人自此衰矣塔旣經焚塗圻皆剝而
磚始露焉唐人墨迹于是畢見今孟郊舒元輿之類尙
存至其他不聞于後世者蓋不可勝數也 續注曰正
大遷徙寺宇廢毀殆盡惟一塔儼然塔之東西兩龕唐

褚遂良所書聖教序及唐人題名記碑刻存焉西南一里許有西平郡王李公晟先廟碑工部侍郎張彧撰司業韓秀弼八分書字畫歷歷可讀

倚塔下瞰曲江宮殿樂游燕喜之地皆爲野草不覺有黍離麥秀之感

張注曰江以水流屈曲故謂之曲江其深處下不見底司馬相如賦曰臨曲江之隄洲蓋其地也劇談曰曲江本秦隄洲唐開元中疏鑿爲勝境江故有泉俗謂之漢武泉又引黃渠之水以漲之泉在江之西旱而禱雨有應今爲濱江農家湮塞然春秋積雨池中猶有水焉黃

渠水出義谷北上少陵原西北流經三像寺鮑陂之東
北今有亭子頭故巡渠亭子也北流入鮑陂鮑陂隋改
曰杜陂以其近杜陵也自鮑陂西北流穿蓬萊山注曲
江由西北岸直西流經慈恩寺而西歐陽詹曲江記其
略曰茲地循原北峙迴岡旁轉圓環四市巾中城坎窞窳
窮港洞生泉翕原東西三里而遙南北三里而近崇山
濬川鉤結盤護不南不北湛然中停蕩惡含和厚生蠲
疾涵虛抱景氣象澄鮮滌慮延歡棲神育靈觀此可得
其概矣唐進士新及第者往往汎舟游宴于此文宗時
曲江宮殿廢十之九帝因誦杜甫哀江頭之詩慨然有

意復昇平故事太和九年發左右神策軍三千人疏濬
修紫雲樓彩霞亭仍敕諸司有力建亭館者官給閒地
任營造焉今遺址尙多存者江水雖涸故道可因若自
甫張村引黃渠水經鮑陂以注曲江則江景可復其舊
不然疏其已塞之泉滍瀦歲月亦可觀矣樂游原亦曰
園在曲江之北卽秦宜春苑也漢宣帝起樂游廟因以
爲名在唐京城內每歲晦日上巳重九士女咸此登賞
袂襖樂游之南曲江之北新昌坊有青龍寺北枕高原
前對南山爲登眺之絕勝賈島所謂行坐見南山是也
出寺涉黃渠上杏園望芙蓉園西行過杜祁公家廟

張注曰杏園與慈恩寺南北相直唐新進士多游宴于此芙蓉園在曲江之西南隋離宮也與杏園皆秦宜春下苑之地園內有池謂之芙蓉池唐之南苑也杜祁公家廟咸通八年建石室尙存俗曰杜相公讀書堂其石室曰藏書龕 續注曰石室奉安神主之室也

出啓夏門覽南郊百神靈星三壇

張注曰啓夏門唐皇城之南門也北當皇城之安上門少西蓋京城之南凡三門中曰明德門今謂之五門西曰安化門今謂之三門此其東門也三壇在門外西南二里百神靈星二壇頗毀而園丘特完南一里有蓮花

村未詳其所以名也 續注曰少西北有唐贈戶部尙書楊貞公廟碑晉公李林甫撰文王曾書王敬從題額次東南有唐相國令狐氏廟碑太和三年劉禹錫撰并書陳錫篆額楊氏苗裔泰和閒尙盛人呼爲廟坡楊辛卯遷移後無聞焉

次杜光村

張注曰杜光村有義善寺俗謂之杜光寺貞觀十九年建蓋杜順禪師所生之地順解華嚴經著法界觀居華嚴寺證圓寂今肉身華嚴寺

東南歷仇家莊

張注曰莊卽唐宦官仇士良別業也士良死籍沒其家
後晉賜晉昌軍節度使安彥威安氏子孫世守之士良
墓碑俱存其南爲郭子儀墓西南長孫無忌之墓碑皆
斷仆 續注曰撫定後府南趙村里皓陽觀主李可貞
喬志朴相過語余觀西北有二大碑云是郭氏墓碑他
日往觀其一壽州刺史郭敬之神道碑敬之字敬之子
儀父也以子儀貴贈太保徐國公碑額御題韓國公苗
晉卿撰序蕭華書其一郭氏所尙昇平公主墓碑書撰
姓名失傳

過高望西南行至蕭灌墓讀碑

張注曰灌嵩之父也碑乃明皇題額張說爲文梁昇卿
書嵩墓別葬張曲

由趙村訪章敬寺基經撥川王論弓仁墓

張注曰五代周太子太師致仕皇甫玄莊在趙村建隆
二年置墓在村東碑在其莊內章敬寺長安志曰在通
化門外本魚朝恩莊也後爲章敬皇后立寺故以爲名
殿宇總四千一百三十間分四十八院以曲江亭館華
清宮觀風樓百司行廨及將相沒官宅舍給其用今此
墓不甚侈且與志所載地里不同豈四十八院之一耶
論弓仁者吐蕃普贊之族也世相普贊戎言爲宰相爲

論因以爲氏聖曆三年以所統吐渾七千帳降唐累有戰功死贈撥川王葬趙村張說爲碑今已毀仆字無存者獨其題額在焉

下勳蔭坡入牛頭寺登長老文公禪堂夜宿寺之南軒

張注曰勳蔭坡今牛頭寺之坡也寺卽牛頭山第一祖徧照禪師之居也貞元十一年建內有徐士龍所撰碑太平興國中改寺曰福昌元豐癸亥長老道文自南方來居于寺之北堂其南軒爲延客之所今有朱公揆題壁

已酉謁龍堂循清明渠而西至皇子坡徘徊久之

張注曰龍堂在牛頭寺之西寺故有龍泉塔院此堂卽其地也泉北有塔俗稱龍堂坡地甚平衍中多植杏謂之杏花坪見杜詡勝游錄清明渠隋開皇初引沈水西北流屈而東流入城當大安坊南街又東流至安樂坊入京城今其渠自朱坡東南分沈水穿杜牧之九曲池循坡而西經牛頭寺下穿韓符莊西過韋曲至渠北村西北流入京城皇子坡又在龍堂之西秦葬皇子於坡底起冢於坡北原上因以名坡隋文帝改永安坡唐復舊

覽韓鄭郊居至韋曲扣堯夫門上逍遙公讀書臺尋所謂

何將軍山林而不可見因思唐人之居城南者往往舊蹟湮沒無所攷求豈勝遺恨哉

張注曰韓店卽韓昌黎城南雜題及送子符讀書之地今爲里人楊氏所有鑿洞架閣引泉爲池穿地得大鳴起信論碑之上篇鄭谷莊在坡之西今爲里人李氏所有韋曲在韓鄭莊之北堯夫進士韋師錫之字也世爲韋曲人遠祖夔後周時居此蕭然自適與族人處玄及安定梁曠爲放逸之友時人慕其閒素號爲逍遙公明帝貽之詩曰香動秋蘭佩風飄蓮葉衣北史有傳今其讀書臺儼然屹立逍遙谷則在驪山西南蓋亦慕夔而

名之也杜甫何將軍山林詩有不識南塘路今知第五橋又曰憶過楊柳渚走馬定昆池今第五橋在韋曲之西與沈家橋相近定昆池在韋曲之北楊柳渚今不可攷南塘按許渾詩云背嶺枕南塘其亦在韋曲之左右乎嘗讀唐人詩集岑嘉州有杜陵別業終南別業而石鼈谷高冠谷皆有其居郎士元有吳村別業段覺有杜村閒居元微之亦有終南別業蕭氏有蘭陵里梁昇卿有安定莊今皆湮沒漫不可尋蓋不特何將軍山林而已

晚抵申店李氏園亭夜宿祁子虛書舍

張注曰申店夾涵水之兩溪李氏名之邵字公材嘗爲
進士祁子虛名徹李舍人壻也園之東有閣曰祕春北
有小軒曰明月

庚戌子虛邀飲韋氏會景堂及門主人出迓明微以爲不
足子虛道其景且誦其詩明微聞之始入其奧

張注曰韋氏名宗禮字中伯世爲下杜人蓋唐相之裔
家失其譜不知爲何房城南諸韋聚處韋曲宜其屬糸
易知然或東眷或西眷或逍遙公或鄭公或南陂公或
龍門公不知其實何房也中伯博學好古葺治園亭奇
花異卉中莫不有日與賓客宴游朝奉郎白序題其堂

曰會景中伯圃中有對金竹其狀與對青相似長安有
此竹者惟處士蘇季明張思道與中伯三家而已

復相率濟潏水陟神禾原西望香積寺塔原下有樊川御
宿之水交流謂之交水西合於灋北入于渭

張注曰長安志曰潏水今名泥水一作坑水自南山流
至皇子坡今潏水不至皇子陂由瓜洲村附神禾塹上
穿申店而原愈高鑿原而通深至八九十尺俗謂之坑
河是也瓜洲村之東北原上潏水北岸上尙有川流故
道西北過張王村之東又西北經內家橋又西北經下
杜城過沈家橋杜城之西有丈八溝卽杜子美陪諸公

子納涼遇雨之地滴水上原西北流而合御宿川水是名交水在香積寺之西南香積寺唐永隆二年建中多石像塔磚中裂院中荒涼人鮮游者

下原訪劉希古過瓜洲村

張注曰劉希古名舜才爲進士不第退居申店滴水之陰瓜洲村俗以爲牧之種瓜之地予讀許渾集有和淮南相公重游瓜洲別業詩淮南相公杜佑也佑三子師損式方從郁牧之從郁子也由此考之在佑已有瓜洲別業則非牧之種瓜也明矣今村南原上有瓜洲墓豈始有瓜洲人居此而名之耶亦猶長安縣有高麗曲因

高麗人居之而名之也

復涉涵水游范公五居

張注曰范公莊本唐岐國杜公佑郊居也門人權德輿爲之記纂敍幽勝極其形容舊史稱佑城南樊川有桂林亭卉木幽邃佑日與公卿宴集其閒元和七年佑以太保致仕居此式方傳又云杜城有別墅亭館林池爲城南之最牧之之賦亦曰予之思歸兮走杜陵之西道若曲泉深池地平木老隴雲秦樹風高霜早周臺漢園斜陽衰草其地有九曲池池西有玉鉤亭許渾詩所謂九曲池西望月來池蹟尙存亭則不可考也又其地有

七葉樹每朵七葉因以爲名羅隱詩所謂夏窗七葉連
簷暗是也以是求之其景可知矣此莊向爲杜氏所有
後歸尙書郎胡拱辰熙寧中侍御史范巽之買此莊于
胡故俗謂之御史莊中有溪柳巖軒江閣圃堂林館故
又謂之五居

東上朱坡憩華巖寺下瞰終南之勝霧巖玉案圭峯紫閣
粲在目前不待足履而盡也

張注曰朱坡在御史莊東華巖寺西牧之朱坡三絕句
極言其景華巖寺貞觀中造寺之北原下瞰終南可盡
其勝岑參詩所謂寺南幾千峯峯翠青可掬是也終南

一名太乙一名地肺關中記曰終南太乙左右三百里
內爲福地柳宗元碑曰據天之中在都之南西至于褒
斜又西至于隴首以臨于戎東至于商顏又東至于太
華以距于關秦末四皓隱于其閒後因立廟唐文宗詔
建終南山祠冊爲廣惠公主峯紫閣在祠之西圭峯下
有草堂寺唐僧宗密所居因號圭峯禪師紫閣之陰卽
漢陂杜甫詩曰紫閣峯陰入漢陂是也太乙在祠之東
霧巖玉案附麗而列二峯之閒有冰井經暑不消長安
歲不藏冰夏則取冰于此紫閣之東有高觀峪岑參作
高冠蔣之奇作高官未知孰是

已而子虛希古開尊三門寺僧子齊出詩凡數百篇皆詠
寺焉予賞蘇子美詩明微吟唐僧子蘭詩疏鐘搖雨脚積
雨浸雲容之句及讀相國陳公悔把吾廬寄杜城之言則
又知華巖之爲勝也酒闌過東閣閣以華巖有所蔽而登
覽勝之眞如塔在焉謂之東閣以西有華巖寺故也今爲
草堂別院

張注曰長安志曰眞如塔在華巖寺今其塔在東閣法
堂之北壁閒二石記皆唐刻也且載華巖寺始末則華
巖東閣本一寺也不知其後何以隸草堂焉

下閣至澄襟院院引北巖泉水架竹落庭注石盆中瑩徹

可挹使人不覺頓忘俗意時子虛希古先歸院之東元醫
之居也予與明微宿焉

張注曰澄襟院唐左街僧錄徧覺大師智慧之塔院也
碑云起塔于萬年縣神禾鄉孫村今屬鴻固鄉元醫世
爲樊川人其居北倚高坡泉聲泠泠竹陰相接圃中植
花穴洞巖閒架閣池上茂林修竹與之隱映真有幽勝
之趣 續注曰澄襟院水久涸今爲長老濱巨源衣鉢
院莊則金興定辛巳閒尙爲元氏之居遷徙後遂無聞
焉近代李構卽莊建閣鑿洞立三清像遂呼爲三清閣
兵後高竇老奉披雲真人爲十方院門人樊志高盡有

元莊典型雖在盛事則廢

辛亥歷廢延興寺過夏侯村王白二莊林泉

張注曰延興寺在楊萬坡斷碑遺址瓦礫徧地興廢之
由無可攷今爲里人劉氏所有竹木森蔚泉流清淺景
勝元醫之居但不葺治耳駙馬都尉王詵林泉在延興
寺之東與朝奉郎白序爲鄰王氏林泉久不治白字聖
均莊有揮金堂順年堂疑夢室醉吟菴翠屏閣寒泉亭
辛夷亭桂巖亭今爲王員外家所有

東次杜曲前瞻杜固盤桓移時

張注曰唐史稱杜正倫與城南諸杜素遠求通譜不許

銜之世傳杜固有王氣諸杜居之衣冠世美及正倫執政建言鑿杜固通水以利人既鑿川流如血閱十日方止自是南杜稍不顯居杜固者謂之南杜以北有杜曲故也杜固今謂之杜坡所鑿之處崖塹尙存俗曰馬壩崖或曰鳳皇嘴不知何謂也杜氏世葬少陵原司馬村之西南杜甫嘗稱杜曲諸生少陵野老正謂杜曲少陵相近故也甫爲晉征南將軍預之後預玄孫某隨宋武帝南遷遂爲襄陽人甫曾祖某爲鞏令又徙河南宋孫洙爲甫傳以牧之爲甫族孫蓋同出于預也是甫乃城南諸杜之裔耳然唐宰相世系不載不知何故俟再考

之

越姜保至興教寺上玉峯軒南望龍池廢寺

張注曰興教寺總章二年建有三藏玄奘慈恩西明三塔寺倚北岡南對玉案峯元豐中知京兆龍圖李公登眺于斯命僧創軒是名玉峯推萬年令陳正舉爲之記

龍池寺直玉案山之北 續注曰興教寺開成四年沙

門令總載修三藏塔銘屯田郎中兼侍御史劉軻撰慈恩塔銘太子左庶子御史中丞李宏度撰西明塔銘貢士宋復撰三藏塔奠中差大右慈恩左西明差小殿宇

法制精密莊嚴

過塔院抵韋趙覽牛相公樓鄉郊居

張注曰塔院者京兆開元寺福昌塔之莊也俗謂之塔院修竹喬林森綠參天池臺廢基頗多不知在唐爲誰氏業俗傳國初狂人李炎居之炎誅沒官後福昌塔成賜之爲常住韋趙村有牛相僧孺郊居子孫尙有存者僧孺八世祖某隋封奇章公長安城南下杜樊鄉有賜田數頃書千卷僧孺居之依以爲學後爲相與李德裕相惡門生故吏各相爲黨先是泓陟相德裕宅爲玉盃僧孺宅爲金杯且云金毀可作他器玉毀不復用矣其言果驗然唐史傳方技者不載其事其亦闕文意乎

迺登少陵原西過司馬村穿三像院尋舊路暮歸孫君中復之廬

張注曰長安志云少陵原南接中南山北直澧水本爲鳳棲原漢許后葬少陵在司馬村之東因卽其地呼少陵原杜牧之自志云葬少陵司馬村柳宗元志伯妣墓曰葬萬年之少陵原實鳳棲原也原脈起自南山曲屈西北岡阜相連纍纍不斷凡五十里然則鳳棲少陵其實一本因地異名耳漢總謂之洪固原今萬年縣有洪固鄉司馬村今在長安城之東南少陵在村之東北則澧水在東非在北矣少陵東接豐梁原或作鳳涼原澧

水出焉東北對白鹿原荆谷水出焉二水合流入渭杜甫詩所謂登高素澹原是也少陵之東岡下卽澹水之西岸其地有泉舊傳有犢跑鳴而泉出今謂之鳴犢鎮三像寺開元中建背倚北原高數百尺始寺依原刻三大佛故名又云開元末爲武惠妃建武氏墓在鳳棲原長興坊與寺亦相近中復田家子今爲進士

壬子渡滴水而南上原觀乾湫憩塗山寺望翠微百塔子虛約游五臺而與僕夫負行李者相失遂飲于御宿川之三渠醉還申店幾夜半矣

張注曰乾湫在神禾原皇甫塔之東舊傳有龍移去南

山炭谷原之湫水遂涸故謂之乾湫炭谷之水遂著靈
異歷代崇爲太乙湫或曰炭谷本太乙谷土人語急連
呼之耳 續注曰塗山寺在皇甫村神禾原之東南舊
傳皇甫村有三社曰鸞駕埤鳳皇臺及廢栖真觀翠微
寺在終南山上本太和宮武德八年建貞觀十年廢廿
年太宗厭禁內煩熱命將作大匠閻立本再葺改爲翠
華宮元和元年廢爲翠微寺杜甫詩雲薄翠微寺則元
和之前固已謂之寺矣百塔在梗梓谷口唐信行禪師
塔院今謂之興教院唐裴行儉妻庫狄氏嘗讀信行集
錄及歿遷窆于終南山鷓號堆信行塔之後由是異信

行者往往歸葬于此今小塔纍纍相比因謂之百塔塔東爲石鼈谷廣惠神祠在焉西爲豹林谷种放隱居之地放居今爲女冠所有蘇季明松門亦在其西而董村者翠微寺下院也又在其西自董村西行幾十里曰豐德寺豐德長老所居今其寺猶有僧焉南五臺者曰觀音曰靈應曰文殊曰普賢曰現身皆山峯卓立故名五臺圓光寺王建集爲靈應臺寺陸長源辨疑志爲慧光寺韓偓集爲神光寺今謂之圓光寺五臺之北有留村數寺皆下院也御宿川按楊雄傳曰武帝開上林南苑至宜春鼎湖昆吾傍南山而西至長楊五柞北繞黃山

瀕渭而東游觀則止宿其中故曰御宿大抵樊川御宿皆上林苑地也

癸丑詣張思道循原而東詣蓮花洞經裴相舊居越幽州莊上道安洞抵炭谷旣行小雨而還復尋會景堂清談終日

張注曰思道唐學士鷺之後居潘水之陰好讀書善屬文雅麗有祖風自思道之居東行五六里直樊川之上倚神禾原有洞曰蓮花舊爲村人鄭氏之業鄭氏遠祖乾曜尙明皇之女臨晉公主杜甫詩有宴鄭駙馬洞中云主家陰洞細煙霧疑卽此地也自洞東行三四里爲

唐裴相國郊居林泉之勝亦樊川之亞亦爲鄱陽沈思之居又南行三里至幽山莊李氏林亭李氏燕人也故以幽州名泉竹之盛過沈莊矣南行四里至通安洞今爲尼院院中起小塔西倚高崖東眺樊南之景舉目可盡又南行七八里至炭谷自谷口穿雲渡水躡亂石冒懸崖行十餘里數峯聳削蹬道之半有司馬溫公隸書二十八字曰登山有道徐行則不困擇平穩之地而置足則不跌人莫不知之鮮能慎谷前太乙觀有希夷先生所撰碑觀南爲故處士雷簡文隱居之地

甲寅北歸及內家橋子虛別焉予與明微自翠臺莊由天

門街上畢原西望三會寺定昆池迤邐入明德門

張注曰內家橋今名也或曰雷家或曰能家皆姓也橋之西又有沈家橋第五橋亦以姓名羅隱城南雜感詩有賴家橋上瀟河邊之句似當以能爲是翠臺莊不知其所以莊之前有南北大路俗曰天門界北直京城之明德門皇城之朱雀門宮城之承天門則界當爲街俗呼之訛耳許渾有天門街曉望之詩可據天門街當畢原之中長安志曰少陵原西入長安縣界五里蓋畢原也志誤以爲少陵西望三會寺寺邊有大家世傳爲周穆王陵北有池舊與昆明池相通唐爲放生池有臺俗

曰迦葉佛說法臺而傳記以爲蒼頡造書臺景龍中中宗幸三會寺與羣臣賦詩上官婕妤所謂釋子談經處軒臣刻字留是也定昆池安樂公主之西莊也在京城之延平門外景龍初命司農卿趙履温將作少監楊務廉爲園鑿沼延十數里時號定昆中宗臨幸與羣臣賦

詩

歷延祚光行道德永達四坊之地至崇業坊覽玄都觀之遺基過岡論唐昌觀故事

張注曰唐昌觀又曰唐興觀在安業坊玄都觀北中有玉藥花元和中
有仙子來觀嚴休父元稹輩俱有倡和

既而北行數里入含光門而歸焉實閏月十六也

張注曰城南之景有聞其名而失其地者有具其名得其地而不知其所以者有見于近世而未著于前代者若牛頭寺碑陰記永清公主莊長安志載沙城鎮薛據南山別業羅隱雜感詩有景星觀桃家圍葉家林聞其名而失其地者也翠臺莊高望樓公主浮圖溫國塔朱坡具其名得其地而不得其所以者也楊舍人莊唯釋院神禾少陵兩原三清觀塗山寺陳氏昆仲報德廬劉翔集之濛溪劉子哀之樊谿五臺僧墳院見于近世而未著于前代者故皆略之以俟再攷至于名蹟可據而

暴于人之耳目者皆得以詳書焉

游城南記一卷爲宋人所作記城南之景甚備中承許少華先生手書予得觀于張華原兄之家甚愛焉遂自錄一過後攷他書始得著述者姓氏明微姓陳西楚人茂中姓張名禮淞右人博學好奇有足多者斯記也屬詞考事詳矣哉予言夫宋去唐未遠而風景池亭猶有存者今門坊之名亦漫不可攷矣嗚呼滄桑易變陵谷難常後之游者其將有取于斯文古稷簾小山道人康樛

光緒辛丑季冬江陰繆荃孫校正付刊

跋

右游城南記一卷宋張禮茂中撰江陰繆氏藕香零拾叢刻本也是編見於馬氏文獻通考及四庫全書總目提要者皆作一卷與繆刻同特禮之里貫四庫提要謂爲浙江人繆刻亦題云浙右而晁氏郡齋讀書志則稱禮爲秦人晁氏蒐討圖籍頗備旣爲是說或當有據又按提要指篇中續注爲金末元初人作咸寧縣志直書爲金人今攷本書下閣至澄襟院條下續注云金興定辛巳間尙爲元氏之居近代李搆卽莊建閣云云審厥辭意追溯金源然則其人似入元代已久不得專以金人目之也其書據徵典

覈四庫提要具有定論咸寧縣志稱於城南諸勝攷證綦
詳且得之目驗可以徵信蓋城南地自漢武帝時已開上
林南苑孝宣尤樂杜鄠之間迨有唐五季貴主鉅公競治
園宅誇勝遂專爲詞客騷人遊眺吟詠之所而不知禮所
敘述每於臨莅名區有不勝黍離麥秀之感至續注動云
遷徙後廢毀殆盡則更感慨繫之矣此編校勘視寶顏學
海兩叢書本爲審閒有一二奪漏今皆據咸寧志暨全唐
詩正之聊備城南故實云爾民國二十四年五月校

長安宋聯奎

蒲城王健

江寧吳廷錫



關中叢書

太華太白紀游略

邵力子署

陝西通志館印

秦中諸山著於載籍者以太華終南太白爲稱首少時習
聞其勝而莫由一覩前歲入關始見所謂太華者金精元
氣不可方物後赴鳳翔又見太白蒼然雲表古云去天三
百殆非虛語然皆縱目及之未獲一攀躋也自褒斜出漢
中又東折至於商顏之下萬山叢沓盡爲終南之支庶余
雖徧歷其境又未能縋幽鑿險登陟極巔是亦與不游等
矣 孚民趙侯吾鄉名宿宦游關內垂二十年所至有聲
曩在長安曾以華山紀游見眎則于役馮翊時所作也今
春又郵寄太白紀游則攝郿時所作也摹寫山中諸名勝
及峯巒斗絕草木深邃蹊徑危逼之狀惟妙惟肖纖巨靡

遺夫紀游之文大率述風景之美侈游觀之娛而已 孳民於華山獨詳關隘爲百姓避賊之資於太白又勘定疆域攷證祀典則其平昔乃心民莫講求利弊不可概見哉 余於兩山旣以未得周覽爲憾竊喜獲此佳文足當臥游他日攜歸京華時一雒誦直覺千巖萬壑羅列凡席其快可知聞 孳民已授洵陽赴官之路實出終南澗谷間屐齒所經搜奇選勝刻畫造物潤色山靈境益進文益高將使秦中三名山盡獻其幽遐瑰詭之觀余卽去陝猶樂先覩以下斗酒也

光緒甲申嘉平中浣蓬萊鄉愚弟慕榮榦拜序

壬午夏偕弟洽軒游太華因夢作紀同人慇懃梓於青
門吾友李子雲生題籤癸未權郡與洽軒又同登太白
公餘之暇亦嘗隨筆紀事時雲生于役漢南郵筒索稿
旣而覆書屬將前後兩紀合刻余以一時遣興未足言
文且非當務置之甲申秋再涖池陽舊日兩書院同社
諸子知游太華太白咸就索稿亦以兩紀合刻爲請因
識數語并答雲生復屬爲我題籤

光緒十年甲申冬月古琅邪趙嘉肇秋厓識於三原縣
署之清白堂

紀游略

太華紀游略

按山海經華山於古文爲惇物又攷括地志在華陰縣南八里白虎通云山高七千仞洞週圍三千里名太極總仙之天余自戊辰迄丁丑四過華麓或至玉泉院仰蓮峯而止心嘆焉縈諸夢寐思約知交數輩聯袂三峯徧歷諸勝蹟而未得當光緒壬午夏復因公過太華時友人泐江陳君簫臺攝篆斯邑因與譚君西屏張丈筑希暨余弟洽軒約期同游余由藍田先至於華陰旣洽軒來遲西屏筑希不至主人假游山具所需備焉遣僕識塗導引意殷殷辭不獲已以四月十日偕洽軒往游出城過玉泉院院主郝

睡雲爲吾鄉曹人棄官隱於黃冠導洽軒觀玉泉水山蓀
亭希夷睡洞虛塚遺跡天然舫無憂亭羣仙殿謁希夷祠
堂堂爲睡雲闢地剏修非舊址也祠後觀二臣塔傳爲宋
臣召希夷者留隱焉登大觀亭卽望河亭下步游廊同憩
玉泉公廨院內無憂樹四株葉細條柔皮類紫薇枯其腹
結實若榆莢石隙根際小樹叢生移栽院界外弗活聞來
自西域與第二關南當年菩提樹皆仙種也出院東便門
乘山輿入峪口二里過王猛臺景略屯兵處上有校將臺
又二里至第一關名五里關扼隘設險地勢奇勝土人告
曰同治初匪首張宗愚竄陝踞玉泉院四十餘日百姓避

賊入山者數十萬人賊屢欲搜山至此不得入男婦數十萬人獲保全者山靈呵護抑此關之力爲多入關走桃林坪過好漢洞觀白鸚鵡看守金甌處石壁題寰中第一山至此而上仙凡判矣過張超谷望試鑿穴卽希夷峽明萬歷間由玉泉院返葬先生處西折四十餘步爲第二關大石中分若斧劈云華山鐵門關望金龜戲玉蟾石南二里許爲莎蘿坪宋太祖與希夷問道處坪東南數十武崖際垂鐵鎖挽升爲上方勝境小上方三洞大上方七十餘洞唐金仙公主修真地墓在焉西元門傳爲元宗鑿石覓妹處吾鄉曹道士隱於上未獲見之西望靈芝石東望桃兒

石桃兒石中空游大上方必穿石度自坪而上爲十八盤
下爲白鹿龕上有白鹿畫白蛇石西南爲毛女峯毛女者
秦宮人玉姜殉葬驪山計逃隱此食松葉體生毛得名上
有毛女洞下又有古丈夫洞丈夫者秦驪山役夫逃隱於
此皆仙去過盤約三里爲三皇臺下有響水石去臺一里
爲雲門有飛來石又上里許至青柯坪自峪口行至此約
二十里坪在西峯下環陀曲磴浮蒼點翠如柯葉東崖題
青柯坪大字太華書院故址無復存有東西道院東道院
玉泉分住者道士尹固菴中州人由入仙菴分住玉泉院
又分住於此世故習嬾其西南峯畔爲北斗坪卽毛女拜

斗處旁有拜斗石道院後有梅花洞西北崖際有白衣洞
南上道旁立大頑石書華山草券殘蝕不完又左上里許
至迴心石游人到此畏巉巖而返者比比也以上路愈險
境愈佳不數武題英雄進步游興至此氣爲之壯又上三
里許爲千尺幢左右挽鐵鎖上登高約六七丈數十百級
最上圓隙曰天井北轉東躋高崖爲百尺峽峽中壁益狹
有塊石夾撐之若恐其復合者人行幢峽中如蟻緣石縫
旋轉然非猱升不能上噫吁巖危乎高哉峽頂巨石爲雲
頭石出峽平石方丈爲望仙臺東北二里許爲二仙橋橋
西崖次爲車箱谷杜詩車箱入谷無多路卽此谷上爲黑

虎嶺再上至媪神洞一曰白雲菴譌爲瘟神洞道士王海

澄定邊人洞外岩下爲聚仙臺傳爲王子丹昇仙處墓在

洞下有華山王氏題名由媪神洞東南上爲老君犁溝云一

離垢挽鐵鎖直上更險於幢上有鐵牛臺卽青牛臺由臺北

轉數十武爲猢猻愁鐵猿三四輩顰踞臺畔相傳月三八

日猿千百爲旅自大上方後水簾洞出遍滿蹊谷至此輒

回自上溝四里至雲臺峯北峯也道士王藥峯商州人居

山最久祠奉眞武後有生生洞楚南黃太守碧川宰朝邑

時所修峯後爲老君挂犁處門外坊曰雲臺第一門又坊

曰白雲仙境坐此樹閒平陀上遙望獅子石白馬石二仙

石騎牛石歷歷如繪其上下仙人房劓巖峭壁幻境尤奇
上房如市鎮然南北廛列屋宇鱗次街頭一房砌壁窗檐
畢具綠樹高低分植門前院內下房如臨通衢飯店茶棚
酒肆比櫛而陳愈望愈真妙不可喻忽而雷鳴雲合大雨
猝至入真武祠避雨小憩頃刻而杲杲出日看峯頭飛瀑
尤爲奇絕扶筇出第一門過仙人碓擦耳崖臥牛石卽鐵
牛崖登上天梯壁立有階可升過金天洞日月岩王母宮
三元洞履閣王碓過道德臺都龍廟卽臥龍菴出三天門
望公主墓漢南陽公主避新莽亂入山仙去自日月岩至
此三里許上蒼龍嶺石脊劍削下臨無地古無欄砌行者

忱焉今可平視徐步相傳自唐始級後復欄以石柱鐵鑊
嶺盡處冒一大石曰龍口一名逸神崖卽韓退之痛哭投
書處由崖上鑿石折身返度曰鶴子翻身過此以往履險
如夷矣南向曲折而上見老松古檜森森立雲際爲將軍
樹按五將軍久不復存其望之儼然者皆將軍子若孫矣
至五雲峯卽將軍而爲古中峯道光二年陝西按察使陳
公枝蕙題額晚宿五雲精舍老道人聾不見客弟子劉鶴
鄰同州人質野樸誠又一道士張華樵冲澹雅靜下山過
此鶴鄰留爲款賓者爲吾鄉棲霞人幼學道居蓬萊長游
盛京又歸游勞山又居京師白雲觀至三江兩湖間游蹤

往來幾遍五嶽歷其四惟北恆未至愛華山先居大上方
移居迎陽洞敍桑梓誼意致殷勤旣而風鳴敲窗夜雨斷
續不成寐余兄弟與華樵作竟夜談天明雨止溼絮遍山
谷閒乍陰乍陽變化不可端倪十一日留住五雲過午稍
有晴色華樵赴友人要下山去十二日天霽山色益佳雨
餘山中寒洽軒借鶴鄰繇衲著之晨餐畢由將軍面尋徑
攀陟觀上馬石嶺如馬脊傳有顛道人往來山頭一日天
馬降就石乘馬去再上過鷄冠石又上一石若斧劈互跨
嶺際名單人橋橋南銜石背而上至通天門卽金鎖關杜
詩箭括通天有一門是也關下磨厓刻袁文誠公筱塢爲

大母祈壽爲汝陝祈雨紀事入通天門里許爲三峯口有
二谿自細辛坪北直界山頂東則中峯東峯至南峯西則
西峯至南峯余與洽軒任游蹤而東先至中峯卽玉女峯
在東峯左襟下當中污際而東峯附玉女祠居峯頂石龜
躡在祠下形如龜前有石躡如坼裂闊五寸深不可測投
以石音逾刻而止卽唐人進簡處玉女洗頭盆在祠前天
然石窩如白盎大小不一玉女龕在祠東玉女石室亦在
焉於此仰仙人掌迹最分明門前石崖袁文誠公鐫隻手
攀天大字循崖而下谿間紆徑溼滑山花千百種燦爛滿
谷中多不識名紫丁香開正繁龍貝花色白成簇香數里

撥花行林中馥浥襟袖樹外藥苗布地若玉朮黃精鮮潤
可愛古人云琪花瑤草者不是過也山徑轉處來東峯石
嶺下拾級而登流雲躡屩天風吹衣花氣雜嵐光清芬沁
入心脾一切塵俗慮爲之盡滌不知身在人閒天上矣至
東峯一曰白雲峯一曰朝陽峯廟宇爲山風吹壞僅存正
殿兩楹山門破落下有水一泓題曰青龍池字入石紋肌
理無斧鑿痕若天然者東北爲仙掌崖卽巨靈擘太華處
足跡在河東首陽山下一云在中條東南隅別一孤峯曰
博臺秦昭王與天神博於此又南下小峯不及嶽之半胸
上有鐵瓦亭一區鐵棋一枰爲衛叔卿博臺懸崖縋鐵鍊

直下約數丈鑱盡處側身蹠崖自度一曰鷓子翻身與逸
神崖異矣余俛視鐵亭棋枰無他可觀屬弟不必涉險循
徑下嶺近迎陽洞以華樵未歸不至過菖蒲池二仙龕出
紫氣臺後小門越澗而上至南天門過雷神洞登聚仙坪
坪高丈許外臨絕壑西下至朝元洞此賀老經營四十年
而成者鑱堦窾石而入有凌空木檻路偏側險且阻又西
石凹處垂雙鐵鑱緹下鐵杙插石崖際承以狹木爲棧道
壁上綴鐵鑱當胸次面壁舒臂緣鑱以足橫移而行至賀
老石室所謂長空棧也俗云九節椽室曰全真洞洞上高
崖數十丈遙覆室外朱書全真崖字大仞許上下無際人

工無所施非御虛者不能袁文誠公賞其奇覓工摹榻懸
千金賞無應募者出天門過玉柱峯經希夷避詔崖洞在
崖際對岸乘略約度之過崖入南岡岡外松林盤屈行林
中漸高二三里至南峯峯最高爲華嶽元首居東西兩峯
間如人危坐而雙引其膝所謂天外三峯削不成也西嶽
殿又居落雁松檜閒山門庭院獨見宏敞遇譚道士河東
蒲州人躁氣不除無可與語登落雁峯觀仰天池池旁題
字甚夥多模糊不可視有馮學使敏昌書兒視諸峯勝宮
保克齋書太華峯頭蔣方伯芝純書沐浴日月皆可觀落
雁峯爲孟津王鐸書在峯下板橋側昔太白登斯峯所云

呼吸通帝座搔首問青天者也黑龍潭在南崖下徑丈餘
深四五尺迤東爲松檜峯高於落雁約半仞遍插松檜望
之蔚然王山史以爲南峯主有以夫上題眞元大字甚佳
爲山史兄王宏嘉書外有五千仞上又目空萬里等字皆
可觀西南里許曰丹峯名老君鍊丹鑪舊有鑪大數丈不
可得而見矣今以鐵鑪徑二尺許當之丹峯高處不及落
雁松檜之半一云孝子峯未審何據由是而西路通屈嶺
三原賀復齋書楊仁甫先生丹峯讀書處下嶺東北行里
許觀玉井及鎮嶽宮皆在三峯中央玉井居上宮前深十
丈韓詩太華峯頭玉井蓮花開十丈藕如船玉井樓與鎮

嶽宮對皆毀圯旁有大檜松高二十餘仞大幾十圍近指
爲將軍樹或云唐時物也屈嶺爲西峯一臂詰屈如蒼龍
廣倍之上有石柱鐵鑱欄由嶺西上直至翠雲宮學使吳
大澂清卿書蓮峯大字西峯一曰蓮花峯一曰芙蓉峯境
最幽甲於諸峯頂上有白蓮池頂西北爲蓮花洞絕頂有
摘星石又劈斧石長十丈餘浮置頂際斷而爲三俗演爲
沈香劈山處嶽殿後爲捨身厓關中李人龍以捨身不可
訓易爲省身厓巨靈足深三寸長四尺與仙掌大小不倫
非巨靈跡可知翠雲宮供金天聖母道士周靜觀蕭疏風
雅山陽縣廩生逃儒歸於老氏之教者客舍亦精潔壁上

有咸陽李虎臣翰林詩屏篆聯吳學使清卿爲李中堂少
荃參軍時所書又出示清卿繪贈蓮峯遇雨圖題語稱佳
結句出山霖雨慰蒼生尤靜觀所擊節坐談移晷徘徊不
能去洽軒赴東秋試買車就道不可稍留遂匆匆去由西
路過坤元宮返至三峯口金鎖關旁無上洞有明嘉靖楊
文襄公一清題名墨蹟存石壁間偉觀哉是時夕陽照谷
林壑明秀暮景尤可賞玩攜筇微唸緩步偕歸劉鶴鄰候
於松徑旁遂復宿五雲峯十三日下蒼龍嶺老君離妬百
尺峽千尺幢洽軒腳尙健余足稍頓小憩青柯坪遇張華
樵歸洞相與周旋去至玉泉院遇舊友屠儀吉委解西征

臺鑲旋汴過此坐話舊雨不覺日晚既別睡雲游雲臺觀
謁朱子祠按宋淳熙乙未有主管雲臺命雖未嘗至心嚮
往之故自號雲臺真逸祠爲徵士顧炎武甯人王宏撰山
史兩先生剋修東爲雲臺書院至今供像猶舊也入城日
已暝十四日洽軒儀吉結伴出潼關取道大梁余亦將之
馮翊憇於客館夜與主人簫臺話山中景三更就枕栩栩
然夢復快游西峯入廟若具衣冠狀禮神爲百姓祈福迴
視筆硯列几案靜觀立於後余蘸墨向東壁題句拈毫若
思靜觀曰何不借我擊節句笑頷之題畢擲筆有聲遽然
而覺情景宛在目前時夜漏四下矣爰披衣挑鐙錄詩走

筆紀之凡斯游目所未經足所未歷者不具書

紀夢詩

重向西峯頂上行出山霖雨慰蒼生

借吳句

爲民祈得昇平

福被野桑麻官吏清

光緒七年秋八月余改官之秦過華山下徘徊不忍去
適里人余樹珊爲渭南令命其甥王偕余往登峯造極
越四日始返一日識趙侯孚民於黃碧川太守座中縱
譚及之太守已三歷其境述前事如繪孚民慨然曰某
蓋有志焉而未逮也其明年夏孚民于役左馮翊歸以
華山紀游略示余噫孚民誠有志之士哉孚民故鄒魯

知名士宰關中十餘年所至多惠政然性戇直不善逢
迎以是鬱鬱不得行其志苟守其志而不變天下固無
不可爲之事也又豈僅區區游覽已耶至其敘事之縝
密數典之博洽文學之士優爲之不足以重孚民故不
贅壬午仲秋漢陽黃嗣東識

接到尊函并華山紀游時有寒疾不可以風此山嘗六
七游亟開卷讀之覺舊日經行歷歷如在目前恍復置
我於三峯閒心曠神怡病魔忽去亦一奇也再三玩誦
尙多前此足目所不及處益見心細量寬無微不至嘗
謂登華山如讀數十種奇書其豁朗如論語其巖巖如

孟子其廣大宏博如大學中庸敦厚處似詩高古處似書陰陽變化處似易有檀弓之奇峭有離騷之幽豔有莊列之恍忽離奇有馬遷班固之峻潔密塞蓋無所不有今紀游亦無所不有知此游所得深矣然或謂山徑之崎嶇易游仕路之崎嶇不易游竊以宦游之與山游一也紀中有之矣履險若夷不必涉險雖曰仕路之險更甚於山徑之險持此二義自得其所以游者此其所以爲偃道人也若躁氣不除之道人尙可語入乎險出險哉三原賀瑞麟復齋跋

攷據精詳敘次疏古未游者慕其境之奇已游者服其

筆之妙泚中簫臺弟陳爵之識

華山起錢來極黃翠凡十九山枝峯漫衍類皆刻露斬絕蓋西方義氣所結而成井絡之精也茲以清峭之筆寫幽險之神摹繪其岌業峻厲之狀變幻離奇無美不至得此一紀足令灑靈生色楚南春田弟楊翰霄識

攷據精核如王阮亭脈絡分明似魏叔子若網在綱有條不紊令讀者不啻俛玉女之鬢仰仙人之掌置身三峯閒矣紀游中大觀也年愚弟閩中陳兆煥筱文識與明陳以忠先生華山游紀篇參觀愈見其妙得此文不負此游年愚弟中州吳炳南煜甫識

往余與歐齋方伯潁牀太史枚如中翰兩約游華而不
果今年夏趙君孚民于役同州又相與訂游期復以人
事牽率仍不果行秋初孚兄由同返省出一編相示爲
華山紀游草展卷三復峯巒歷歷如在目前天雖靳我
一游蹤不得親歷然覩吾友茲編已如身在三峯絕頂
坐我於煙雲翠靄閒抵掌快談天下事俯視人世能無
慨然歲在元默敦牂中秋朔日旌德西屏弟譚麐謹跋
簡古明潔可謂筆參造化憶咸豐丁巳莫春之初偕同
研數友人嘯傲峯頭倏忽已廿五年矣其時同游諸君
半已物故其存者或宦他鄉株守田園者惟區區一身

撫時感事讀斯紀游不勝慨然因作俚句識後云謁罷
金天廿五秋山光雲影過如流使君有筆驚風雨觸目
傷懷感舊游渭南治宗弟元中乾生識

胸中有竹舌上生蓮如淮陰將兵多多益善驅使綜核
之才卽復以斗石計至結處天然一夢與古爲新前有
東坡後有秋厓鄉小兄海豐張守嶠海峯跋

與東坡同一夢游而一在觀物一在濟物有心者不以
游觀忘斯民固於紀夢詩中見之也且歷敍山中景物
句峭筆爽引古證今至詳且確披讀一過覺三峯如在
目前以此當少文臥游亦快事也年小弟長山焦雲龍

雨田識

焚香靜讀恍若身歷何時捧此冊徧歷三峯步步趨趨
應不至迷途而返受業渭南曹季鳳雪晴注

華山突兀三峯橫亙天外通天門內外佳景十百遂次
羅列如伏波聚米爲山布置皆有法度篇中敘五里關
保全數十萬生靈及夢游爲百姓祈福尤見平日關心
民瘼卽當捫奇探幽寤寐未嘗一刻忘也受業朝邑邢
寶書葆初注

胸中無三萬卷書眼中無天下奇山水那得繭絲牛毛
不遺纖細譬古彝鼎圖星象雲氣人皆欽其寶莫能名

其器至游歷之頃斯世斯民縈諸夢寐真有古人登樓
閱江之思借我擊節句則靜觀者可與赤壁道人俱傳
矣受業蒲城常鼎馨蘭軒注

十年游興一朝愜懷故能思入風雲筆參造化文章千
古事極大觀而無遺憾受業三原李聃齡根生注

蕉心繭絲引人入勝惜未獲陪侍杖履續舞雩盛事然
自此三峯靈蹟日往來於胸次矣受業三原晁鴻年秋
舫注

君年六十我四十君名曰肇我曰績旣卜甲年符誕生君生

甲申余生甲辰喜獲嘉名更同錫君家乃在齊魯南我曾歷歷

游踪探君宦乃在秦關北我亦相隨共棲息君登太華
矜神行作紀早使山靈驚我亦高躡三峯外得句蒼茫
造幽怪與君出處將毋同大千界列方寸中得一知己
可無恨性靈况復常相通從來世事多奇偶胡爲爾我
同先後搔首問天天不知萬古鴻濛一尊酒落落元龍
意氣豪相思不見心爲勞澡罷滄浪自安枕臥看明月
青天高潞河弟李嘉績漢南郵藁時甲申閏五

太白紀游略

名山在雍州域者曰終南曰太華曰太白說者謂山莫長於終南莫奇於太華莫峻於太白終南太華載在禹貢漢唐以前太白無徵或曰卽太乙或曰卽敦物皆非也按洞天記暨白玉經三十六洞天太白居第十一爲德元之天余游太華之冬檄權郿篆同年中州李子賡伯以長安令陞漢陰別駕時調攝武功書貽余曰郿之民聞君來如望歲吾不賀君獲治郿爲民賀爲太白山賀也溯漢以前太白爲武功山自邑遷渭北始專屬郿其興雲降雨澤利民生歷代靈蹟不具論唐宋以來若李青蓮杜子美有詩陸

魯望有敘柳柳州有碑版蘇東坡有奏議 國朝山人李

雪木柏賈觀察鉉

按郿志曰鉉郿志曰鉉未詳孰是

汪司馬臬鶴有程記

近百年來流風漸歇每歲六月山開惟男婦進香者踵至
卽有時禱雨祈水而來者見亦罕矣吾有志未逮知君有
山水癖凡所以觀風俗正經界勤民諸政必能次第行之
庶幾探積雪之巖挹靈湫之水爲名山一條塵俗也及之
任道出武功賡伯舉酒招飲復殷殷致詞謝曰唯唯旣抵
任摒擋公事卽入鄉問民疾苦進耆老數輩來前使席地
坐與之話農桑詢田里少壯者環立肅聽耆老進曰吾民
自兵荒後元氣未復所幸豐年屢告衣食能粗給耳蓋藏

蓄積無有也老死田閒無事不至公堂每患官與民不相親閭閻隱微末由上達若得官不時來吾鄉民有所質速爲理之無論莠民不得肆其譁張良民亦不至悞於稼穡所望於官者足矣吾儕小人抑又何求話畢慰勞使去數月後四境之人情風氣得其大致矣癸未三月旣望余弟洽軒由東來署喜曰昨游太華今又可同登太白迨五月後登麥旣畢鋤禾正忙人語樂歲花落庭閒時方稽查保甲至邑東鄙乃約洽軒暨同里高曉塘之甥田子受之治具來游於六月二十六日由槐芽鎮至遠門口宿保安宮遠門舊有十三宮今圯其三保安由官建餘皆民私祠

也晚有二三老民來謁請曰登此山往返四百餘里莫或推之莫或挽之恐不任其勞民有子弟可使前驅曰游山雅事何束縛馳驟爲吾之來非徒騁游觀以縣之四境東鄰整厓東北鄰扶風北與西鄰岐山悉爲識之惟南鄰佛坪界在太白之顛吾因查保甲而略地因略地而游山卽或力絀而返吾心盡矣不欲重勞吾民也其毋舍我穡事二十七日昧爽興舍車而徒與洽軒受之皆筇杖芒鞋從者負餼糧以行過三官池艾蒿坪小雪厓大雪厓峯回路轉溪徑縈紆龍盤山有神廟湯房於此煎茶飲之至小郭集望香巖山觀音大士香煙地一曰麀引山據云昔人登

山無路見羣麀導引攀蘿捫葛隨之踰數丈徑豁然闢遂
修路建廟於上近則南北峯際紺宇林立山趾撐木梯數
十尋通行人跡卽少白山也七月朔香火甚盛男女奔走
偕來有老民設湯房於山下聞余至煮粳米獻受其汁飲
之歷新桃碓舊有仙人橋無復存尋賈觀察所書隔斷紅
塵亦被山水沖失過露風厓小西坵至大西坵廟三椽湯
房一間洽軒攜僮前行余與受之入廟小憩有蟲飛集似
蟻而大名馬漢沖齧人甚利同來接官亭南北神廟各三
椽東一帶草棚泉石環流淙淙西爲守亭者王姓居宅由
遠門至此三十里躡澗行亂石中高高下下雖無甚險阻

路頗崎嶇是日暑氣猶盛烈日炙人過午益揮汗不能行
遂宿於此二十八日早行至石壘一名土壘所云萬笏山
也北望村墟市橋都來眼底復下一梁狀若門限曰下壘
過此則峭嶂摩雲面壁緣牆而行所喜山徑曲折澗壑陰
翳兩厓畫眉黃鸝軋軋絲蠻不絕有小鳥聲聲呼曰山客
早回語音瀏亮泉響風清使人勞而忘苦登石壘頂卽獨
秀峯回視土壘直拜下風行至此二十里始入太白山門
戶有紀道人修板廟三椽草殿六間又依厓作室半樓半
洞灑掃淨潔於此早餐而行紀道人又遣人攜釜負米先
往候於下坂寺是日驕陽薰熾松風不動行至竹雲嶺上

忽見峯頭澗底噴白如湧絮頃刻瀾漫山谷十餘里至黑
風門卽神會天蜀中善民李騰慶寓此修路冬則修山之
陽夏則修山之陰無閒寒暑已十二年至土地嶺遙聞雷
聲殷殷下嶺未四五里風雨大作趨松花坪石廟中避雨
逾刻不止復冒雨前進所歷大壑落水簾洞諸景皆不暇
顧雨中行三十里至下坂寺衣盡沾濡易以乾衣溼者付
火烘之與洽軒受之痛飲至醉皆有寒色晚餐旣畢和衣
而臥廟僅板屋三椽供神外隙地無多是日避雨者麇集
二十餘人同宿廟中人語嘈雜聲風雨瀟淒聲終宵不能
成寐二十九日雨止天霽諸峯淨洗松翠欲滴景射朝暎

煙抹如畫過臥牛臺卽駱駝嶺兩山夾澗互如浮梁迤邐
向西南行上山則蒼松夾道石磴盤紆至救苦嶺雨後泥
路峻滑少懈卽致傾跌度瘦魚兒嶺石窄如劍脊至上坂
寺日方亭午昨被風雨所侵足力微頓從者又以前無宿
處至大太白池尙六十餘里於是飭採樵蘇汲泉造飯憩
宿於此廟共板屋六椽倚崖東向門外下臨絕壑日落山
暝望東北星斗界處雲岸高立蒼茫似海約五更時出寺
門外忽見雲海中霞采遄飛金光迸射少焉日露半規漸
次湧上大如車輪及將離雲海極力騰躍若日光與波光
俱長三五躍始出海旣出則圓明如鏡餘霞散而成綺檐

際曙色照耀分明俯視澗谷猶黑如漆憶當年登岱至日
觀峯未見出日不意得於此觀之三十日鼓力前進過寒
風關上沖天嶺四望諸峯羅侍有若迎者有若趨者有若
列坐而拱衛者嶺上新修礮路似險而平履之令人意適
逾嶺循厓下澗傍山行十里至神窪有石洞板屋又過魔
女嶺分天嶺雷神峽鬼門關二十里至鬼窪亦曰孤魂窪
有大板殿北向孤立以亂石堆圍之居兩山之凹東西皆
大壑陰風慘烈景物淒然雖天氣清明日色薄而無光懍
乎其不可少留大太白池齊道士聞余至山來此拱候使
導洽軒前行余與受之緩步於後至窪上覓所謂三山九

牙十二重樓諸勝但見怪石嵯峨山鵲野樵秀映草際泉
涓流如涔旁生白芽若草若木山人取以煎飲曰太白
茶過二里關一曰三天門仰見太白極頂曰八仙臺碎石
堆銀色如積雪上立標竿長二丈許又過金鎖關臺上籬
鳴報午如聞空中天雞由鬼窪行此三十里爲大太白池
廟背嶺依臺西向臨池池約三十餘畝清鑑毫髮莫能測
其深際有鳥飛鳴水次馴不畏人自呼曰淨池淨池云大
者如畫眉小者如脊令皆頂白衣烏尾際雜紅黃色亦有
花紋麻色者池有纖草卽飛鳴銜去故名淨池鳥池踞山
巔終歲不涸不溢非神湫何以能此或曰下有蟄龍理或

然歟水味甘美任人汲飲惟不敢以不潔之物觸穢之若
云時現異光或好事者故神其說詢諸道人笑而不答余
靜觀移時見池水如拭鏡天光雲影各隨所照故云有五
色萬壽字珠油等光之異晚宿廟內夜來風雨又至七月
初一日天明大雪檐際垂冰筋尺許人著重裘不知其溫
惟飽食蕪羹之粥閒撥煨芋之火下方嚴冬天氣不過如
是向晚天色晴霽初二日洽軒住大太白池余與受之西
過楊四將軍池行稻田窪淺水莎草扁石履卑饒有澎池
北流之趣又西南二里許爲走馬嶺通去洋縣道石上苔
蘚結成馬足痕大小不一色雜青黃輪廓竈門畢具宛然

馬蹄印於石上者隨指爲天神行馬處折而南下三里爲
二太白池池約十餘畝廟在池南楊道人以營員棄官隱
此不常川於山中洋縣境上別有丹邱又東南下五里爲
三太白池池約四十餘畝廟北向臨水次木工甲他所由
二太白池來此路頗幽峻中有石厓欹澗立以略約駕空
而度如太華棧惟十餘步深能見底履之不致惴惴又八
里爲玉皇池池大頃餘廟在池右依山結宇樹木漸多道
人李姓款客必恭又東南行沿路林木茂密有樹翹肖枝
柯蔓生名抓地松五里爲三清池水已半涸松滿山谷林
內產佛手參長寸許有指有掌金背枇杷葉能療疾從人

多採擷之藥王洞在其南佛池在玉皇池西皆以日暮不
至返經玉皇池李道人約供晚餐受之憊留宿於此余急
返大太白池至已鐘動矣初三日洽軒先下山余遲受之
於後受之既來猶憊約明日早行余獨上太白極頂於山
之陡絕處賈勇而登陰處猶多積雪石隙中小草山花能
於冰雪之際傲寒吐放亦著奇觀陟八仙臺涂道人建廟
於上嗾誦皇經其人頗識黃庭道德諸籙與之坐談移晷
共步臺畔四顧蒼茫於東北望見長安其附近諸邑指視
歷歷渭水一綫如帶可掇山之南高崗峻坂爲佛坪梁尋
郿佛分界處臺之北屬郿南屬佛廟居郿佛之交前十數

武爲涂道人新鑿九龍池又前爲雷神殿卽雷神洞山頂
平處約十餘畝白石如沃有草無木步至西臺而下復由
稻田窪回憶太白山圖三池上下鼎列茲按其地大太白
池在山北餘在山南夫太白屬金金生水故神湫能沛甘
霖山自頂至踵石土相間皆潰溼無一燥處人行山中溼
氣藥苗氣加以日氣薰蒸鼻觸之頭輒昏昏作痛咀以檳
榔甘草解之石大而質麤多劈裂痕故不能鑿洞不能鑄
碑又攷太白者西方神之名也佐帝少昊執矩而治無所
謂伯仲叔也漢成帝時有太白祠神曰谷春春爲祠神非
太白山神五代時或曰崔活益荒誕不經唐天寶七載封

太白山神爲神應公十四載改封靈應公宋皇祐五年封爲濟民侯自是禱雨不應嘉祐六年蘇軾代宋選上言復

封明應公熙甯八年進封福應王紹聖三年改封惠濟王

至於有元則析封爲三王曰普濟曰惠民曰靈應俗稱曰大阿福

二阿福此大太白二太白三太白所由昉也肖像以三池

亦分隸之俗呼曰大爺池稽諸古籍無可依據按池有二

池太白二池太乾隆五年總督尹繼善奏入陝西祀典三

十九年巡撫畢沅奏封昭靈普潤太白山之神號曰福應

王並新保安宮新開山各神廟載在邑乘是晚天色濃陰

夜復雨雪天明晴霽初四日偕受之下山齊道士送之是

日微風澹雲乍陰乍陽共覺身輕腳健勝於來時過雷神
峽遇山下民會賽神者執旗鳴鉦咸於道傍作禮神窪以
上雲氣襲衣若迎若送仰望遙空無纖翳俯瞰林壑日色
蒼松惟片雲頭上籠罩以行及沖天嶺上雲氣全開西望
菩薩山拱向太白若佝僂鞠躬狀俯視五丈原頭惟見一
帶紅匡閣閣鋪地救苦嶺畔見松雞雌雄將雛行林薄內
樹上松鼠往來杙杙閒跳躑自若人與物俱無機心下坂
寺有劉姓老民負糧攜瓜久候於此遂煮麵飽食而行山
上野筍雜花叢秀可愛回望二仙山怪石古松如亭如蓋
過水簾洞復遇李騰慶在此斬木開道住語移時洽軒已

游新開山遲余於接官亭使人持書來迎旋至松花坪避
雨處不堪回首然攜得晴雨兩幘畫圖歸裝亦足快意神
會天下有黃泥坂數里與泰山中快活三大致略同及石
壘頂日已曛宿於樓洞上層初五日早行未晨哺時已到
接官亭洽軒具早餐山蔬豆味最佳又山下老民等結山
輿來迎慰謝去之食既畢受之同洽軒先回遠門余西行
十里至新開山陟其上周歷眺望見四圍錦幃環列如城
滿山產青桐樹蔥蘢可悅山上有坪有阜有池有泉亦勝
蹟也雖著人力多由天成若非廁於名山之麓亦當無佛
稱尊老道人李姓由保安宮來居於此年近八旬步履猶

健送余下山再三止之而回晚來遠門復宿保安宮次日
乘車由槐市回計往返十日周行四百餘里亦云勞矣然
全郿之界皆在吾心目中惜賡伯已挂冠去未由舉酒相
招翦燭共話爲悵悵耳客告余曰關中名山終南東西互
長八百餘里章矣若太華太白而外更有吳山居汧隴間
嶽鎮是也

太華譬諸行文挺拔修潔局勢緊密讀者易爲賞心若
太白則汪洋恣肆疊矩重規非拓開心胸放寬眼界未
易得其起復迴環層折不窮之妙太白山真奇文真奇
觀也惜地僻山深風雪不時廟宇無多宿食未便故游

者常少又無古碑舊蹟堪令尋味以故詞客文人至者益尠徒以世俗所謂威靈震疊者驚駭愚夫婦耳目每歲六月山開接踵奉香於道以媚神邀福致令清奇仙境穢於塵俗可慨也山中六月中旬必大雨一次謂之洗山有以夫然登此山亦正復不易非多攜衣物食具自度其筋力足耐勞苦未許冒昧前進否則恐有性命之虞在彼蒼非有所祕惜太凡天下愜心之境未有不辛勤敬慎中來者豈第游山也哉余幸爲過來人特瑣瑣及之以告後之游此山者

跋

右太華太白紀游略清沂州趙嘉肇撰嘉肇字孚民以舉人作宰於秦循績著白茲紀其令華陰郿縣時所作也太華太白紀載夥矣大抵侈三峯之偉奇夸三池之神異鮮有言及民莫者茲雖紀游而正疆界詢疾苦夢中栩栩猶禮神爲百姓祈福吾又以歎承平儒吏之風規念念常切乎民依雖一游觀莫之替也昔歐陽公治滁山水游記均有與民同樂之意趙侯茲紀其殆庶焉故印入叢書特彙茲義於卷尾民國二十五年一月校

長安宋聯奎

蒲城王 健

興平馮光裕

